

Te siku leo o te Ekalesia **TELAMA**

LOMIGA: 01/2014

www.ektuvalu.com

IANUALI - MATI 2014



FAKASOLOGA

Taugasoa Kelisiano.....	1-3
Lauga.....	3- 4
Misiona ki te Falepuipui.....	4
Mo Fafine.....	4-5
Mo Kauvaka.....	5-6
Malaga Asiasi a te CWM.....	6-8
Malaga ki Jamaica...8-10	
Sukesukega ki te Tusi Tapu.....	10 -11
Fakafeagai mo nisi Talitonuga.....	11-12
Tala mo Tamaliki.....	13

TAUGASOA KELISIANO

REV. SEMISI NIMO - PELESITENE

Talofa te 'malu o te kau faitau lama i te lama muamua o te tausaga fou tenei. E tavae ne tatou a te Alofa lauefa o te Atua, e tusa i ei mo ana faiga alofa ki a tatou, tela ko oko mai a tou fai'ga malaga ki te vaitau taukatamata o te tausaga 2014. A fakatalofaga mo fakamanuiaga a te Ulu Ofisa o te Ekalesia Kelisiano Tuvalu mo koutou katoa taugasoa faitau ki te Lama e fakavae mai i te molimau a te tusi tala ko Mataio 2:1-2

A lesu ne fanau i te fakai ko Petelema i te fenua ko lutaia, i aso o te Tupu ko Helota. E isi ne tagata poto i uiga o fetu ne aumai mai te Sopogala ki lelusalema, kae fai mai, "Tefea te tamaliki ne fanau mai, tela ka fai mo tupu o tino lutaia? Mene matea ne matou a tona fetu i te Sopogala; tenei te mea ne aumai ei matou o tapuaki ki a ia."

Te tala o te fanau mai o lesu te tou Aliko Fakaola se tala tafasili i te taua kae tu kogaloto i mafaufauga mo agaga o tino talitonu katoa i aso nei. Kae tiga te taua o te tala o te fanau mai o lesu, e uke a vaega o te tala tenei e se fakamatala ne tusi tala o evagalia, e pela mo nisi vaega konei:

- I te otiga ne fanau a lesu, e se fakaasi mai me pefea te leva o losefa mo Malia i lelusalema kae sola a latou ki Aikopito?
- Ne a a lagona ne oko ki te tamana ko losefa mo te matua ko Malia e uiga ki te pepe tenei a laua, ona ko tala mo mea ne tupu i taimi tonu tena?
- Ne a a lagona o tino i la tafa e uiga mo te pepe fou? Kae ne a foki a fakamatalaaga a losefa mo Malia ne fai ki fesili a tino kola ne olo atu o asi te pepe? – E SEAI NE TALA MANINO I TUSITUSIGA A EVAGALIA MO MEA KONA

Tiga i ei a mea kona, e isi loa ne tala manino lei eilola ne fakamatala fakalei ne tusi tala o Evagalia, tasi mai ei ko te tala o 'tagata poto' mai te Saegala, i Mesopotamia kola ko te fenua o Iran mo Iraq i aso nei. A tino i lelusalema ne ofo kae poi, me ko gaki atu a tagata konei mai te Sopogala mo te tala fou a latou e uiga ki te tupu fou o tino lutaia tela ko fanau mai. Ne fai mai te tala a latou, me ne lavea ne latou te fe'tu tenei i te Sopogala kae ne taki ne i a latou mai ki konei i leusalema.

A te muna 'Tagata Poto mai te Sopogala' ne fuli mai i te muna Eleni ko te 'Magi' – A tino konei ne faitaulaga o talitonuga faka Pelesia (Persia), a latou ne tino e poto i te fakamatala o mea ka tupu i te taimi mai mua mai i olotou matematega o fetu mo fakamatalaga o moemiti. (Tino fakataulaitu/sorcerer) A latou e sei ne tupu, kae e seai se fakamatalaga faka te Tusi Tapu e uiga ki olotou igoa; e seai se molimau mautinoa me tokofia a latou kola ne aumai o sala a lesu. E tokouke e fai mai me tokotolu a latou, ona me tolu a meaalofa kola ne tuku ne latou ki a lesu, tela ko te aulo, sinu manogi ko te pulu lipano mo te pulu mulo.

LAMA PUBLICATION

Ekalesia Kelisiano Tuvalu

P.O BOX 2

Funafuti - TUVALU

E-mail: gs_ekt@yahoo.com

www.ektuvalu.com

Te taua o te tala o tino poto mai te Sopogala efakaasi e auala i olotou gasuesuega konei:

Tasi: Ne lavea ne latou te failoga i te lagi, ko te fetu o te tupu fou ko fanau mai. Se taumate, te fe'tu tenei e kese mo fe'tu katoa ona ko mafai o lavea ne latou mai i te kiumoleva o fetu o te lagi

I aso nei ko oko loa te uke o mea e fakanumi ne ia a tou kilo mo tou mainaga e uiga ki a Iesu. Ko tona uiga, ko tau mo tatou o kilokilo kae matemate fakalei a mea tupu o aso nei ko te mea ke lavea ne tatou te fetu io me ko te failoga o te Tupu ko Iesu tela ko tu i te lagi. Ko latou fua kola e lavea ne latou ka fai ne latou se faiga lei e pela mo tagata poto mai te Sopogala.

Lua: ne gasuke (motivated) a loto o Tagata Poto mai te Sopogala i te laveaga ne latou te failoga o te tupu tela ne matea i te lagi.

Ko tu nei tou vae i te vaitau fatoa oti atu ne fakamanatu ne tatou te tau o te Kilisimasi. E mata e isi ne lagona fou ne faite mai i te kiloga o tou mata o te fakatuanaki ki te fakailoga o te tupu fou ko Iesu? A lagona fou o tou loto talitonu mo tou fakatuanaki e kumi faeloa i aso nei ne faifaiga tau pisinisi kola ko fakaaoga ne latou a te Aso o te Tupu ko Iesu mo fakamalosi a te togi atu a olotou koloa.

A fakafiafiaga 'se kola ko tu kotaloto i tou olaga pela mo 'Party Kilisimasi' e aofia i ei te inu kava fakatakali ali mo nisi uiga 'se – kae e fai a tou fakamasakoga me ko fiafiaga loa o te Aso fanau o Iesu. Taugasoa Faitau ki te Lama, ne a a manatu o koulua e uiga mo tou faifaiga konei ko lasi te fakaaoga i tou fenua mo te Atufenua. E mata e tonu mo te loto o ia tela ne fakatu ne ia te fakailoga o te Tupu Fou i te lagi?

Te tala o Tagata Poto mai te Sopogala ne fakaasi fakalei mai ne latou a vaega polokalame kola e tau o fakataua ne tatou i loto i te tau o te Kilisimasi: E tolu a mea taua ne fakaasi mai ne tagata poto e mafai o fakavae ki ei a tou polokalame i te vaitau tene. Te mea muamua ko te sala ke maua ne koe a Iesu i te taimi nei, e pela mo tagata poto ne aumai i se koga mao o sala ke maua ne latou a te Tupu Fou tela ko tu tena fakailoga.

Taugasoa faitau ki te Lama, kafai e tau koe o fanaifo loa ki tulaga tafa fataua pela mo te fale o manu ko te mea ke maua a Iesu, sa faitali, kae ui keatea mai tou olaga te loto fia maluga; te loto makeke; mo manatu fia taulia. E tena te auala e maua ne koe a Iesu i vaitau penei. Te lua o vaega o te polokalame ne lavea i faiga a tagata poto ko te fai mealofa ki a Iesu. Taugasoa, se a loa te mealofa tafasili i te taua ne tuku ne koe mo Iesu?

Taugasoa, filifili fakalei me se a a tau mealofa e tau o tuku ki a Iesu i tona aso tenei. A koloa mo aulo e a ia katoa. Tela la, e tau loa o ave ne koe se vaega tonu o tou ola tela e pule a koe mo au i ei, mo ia. Te toe vaega taua o te polokalame mo te Kilisimasi ko te tapuaki ki a Iesu mo te agaga tonu. – A tagata poto ne malaga mao mai o tapuaki te pepe i te falemanu. Ko lavea ne tatou me e tolu a polokalame lasi kola e tau o fakamalosi ne tatou i te vaitau tenei, tela ko te sala ke maua a Iesu e auala i te talo mo te tauloto te Muna Ola a te Atua, Tuku atu tau mealofa ki a Iesu mo te tapuaki ki a ia i aso katoa.

Tolu: Te toe mea taua ne oko ki Tagata Poto konei, ko te tulaga o te fai malaga mai o latou o olo keatea mai te koga e nofo tumau ei latou o sala te tupu. Ne tiaki ne latou te olotou fenua kae malaga o sala te koga ne fanau ei te tupu

Se a te tusaga o te fe'tu ne fai ki tou olaga i aso nei?. E mata ne talia ne koe o gasue keatea mai tou 'palesi' io me ko te olaga filemu i tou fenua, kae fano ki te koga ko fakasino atu ne te fakailoga i te lagi?

A tagata poto ne tiakina ne latou te koga ne nofo i ei kae malaga o tautali i te Fetu o te Tupu

Te koga muamua ne afe i ei a tagata poto ko LOTOMASEI tela ko Ielusalema. Ne lagona ne te Tupu o te taimi tena ko Helota te tala fou a tagata poto e uiga mo te tupu fou o tino lutaia tela ka fanau mai – ne lotomasei a ia kae ne aofaga ke tamate te Tupu Fou.

Te lotomasei o tagata mo fafine i loto i te Tala Lei i aso nei, ko auala ei o uke a mavaevaega i ekalesia. Ne mafua mai i te lotomasei tenei a te uke o talitonuga fou konei ko gaki mai i aso nei. Te tupu ko Helota ko lotomasei ki te Tupu Fou o tino lutaia ko Iesu.

NE FAITE I KONEI TE LOI MO TE PELO LASI O HELOTA – "Olo o sala te koga e nofo i ei te tupu fou, ko au ke fanatu o tapuaki ki ei. E lua a tusaga masei ne sae ake i Ielusalema te laumua o te olaga tapuaki o Isalaelu; ko te lotomasei mo te loi io me ko te pelo. Te mavaevae o ekalesia kae ko fanau mai ei a talitonuga fou e pogai katoa i te lotomasei mo te loi.

Ne fakasoko te malaga a tino poto mai te Saegala ki Peteleema te fakai tela E SEAI SE POTU MO IESU I FALETALIMALO. Fakalofa i a Peteleema te fakai ne valo ne te pelofeta ko Mika (5:2) me ka fanau mai i kona a te Mesia, kae tela la, e se toka me seai se koga mo ia i te faletalimalo.

Ne maua ne latou te Tupu tela e o ia te fetu i te Falemanu. (te ata o te lotomalalo). E seai ne tupu e

masani o fanau i konei. Te Tupu Fou ne fanau i te falemanu ko Iesu. Taugasoa faitau ki te Lama, e se taumate ko maina lei a tatou i polokalame fakatoka mo te Aso Kilisimasi mo tulaga taua kola ko avaka i te taimi nei mo fakamalosi a tou loto fakatuanaki ki a Iesu te tou fakaola i te kamataga o te tausaga fou tenei. Te Atua ke avatu ki a koulua a fakamanuiaga o te tausaga fou.

LAUGA

Rev. Kalepo T Vevea (Faifeau o Masela)

Tusi Faitau: 2 Tupu 4:8-10

Matua: 2Tupu 4: 10 “E lei ke faite se potu foliki i luga, kae avatu ki ei se moega, se taipola, se nofoaga mo te moli. Ka nofo a ia i te potu tena i so se taimi e asi mai ei ki a tatou.”

Manatu Sili

Fakatoka se avanoaga mo te Atua i loto i ‘tou olaga.

I te olaga tenei, e uke a atiakega ko lavea kae ko molimaugina ne tatou, e se gata i tino takitokotasi, ko kaiga, kae ke oko foki eiloa ki kamupane, fakapotopotoga, fenua, ekalesia, malo ke oko foki ki te atufenua.

Ko atiakega konei e pela mo te faitega o fale, fakaleiga o auale, fakalasi a te malae vakalele, faitega o puipui tai, faiga o akoakoga ki te fakalauefaga o manuia tumau mo te fakatumauga o te ola lei o mea ola i otou tafa....Ko atiakega o te olaga tenei kola e aofaga e palani, kae e fakatoka mo te ola lei mo te ola manuia o te tagata i tona olaga fano ki mua.

E foliga penei a te atiakega io me se fakatokaga tenei ne fofou aka i manatu mo lagona o te fafine maumea mai Sunema. Ana muna ki tena avaga. Au e talitonu me i te tagata tenei e vau saale ki konei se tagata o te Atua...Kaati laa“E lei ke faite se potu foliki i luga, kae avatu kiei se moega, se taipola, se nofoaga mo te moli. Ka nofo a ia i te potu tena i sose taimi e asi mai ei kia tatou..”

Ko tafaga a te fakatokaga io me ko te atiakega a te fafine Sunema tenei. Te fafine ko kilo mao mo se manuia e se gata ko ana fanau, kae ke mailoga i ei ko tena kaiga. Te fakatokaga ko nofogamalie kae a te lumanai manuia o te kaiga. Te Fafine ko malamalama me kafai e talimalo ne ia a te tagata tenei ka maua ne ia a fakamanuiaga mo tena kaiga.

Te fafine ko maualuga i a ia a te alofa ki te tagata o te Atua. I loto i atiakega o tena kaiga mo te manuia mo aso mai mua...ne fakataua foki ne ia a te fakatokaga mo se avanoaga mo Elisaia te pelofeta a te Atua, ko te mea ke isi sona koga nofo tumau i loto i tena kaiga. E se gata ko

te potu, kae ko aofia fakatasi katoa iei mo mea kola e manakogina mo fakatino a te galuega.

A Sunema se koga fenua e masani o ui iei a Elisaia i tona auale mai Samalia o fano ki te mauga o Kalamelu. Kae ko ona tala ne tala e se taulia, aua se fenua e fapaupau a ona tagata. Kae ko lauiloa a Sunema i loto i tala o te Tusi Tapu ona ko te palani mo te fakatokaga alofa tenei a te fafine. Mai luga i te talimalo lei ne te fafine Sunema a te tagata o te Atua. Kae e se gata i te tali malo lei, kae ko oko foki loa o fakaavanoa ne te fafine se vaega o ana mea totino ko te mea ke fai mo koga e malolo kae manava iei a te tagata o te Atua.

E fakaasi mai i konei me e isi se fakamoemoega ola i loto i te olaga o te kaiga tenei. Te Atua e mafuta mo te kaiga tenei, tenei ko ala i ei o foliga mai se vaega galuega alofa penei. Masalo ne fakalogo a te fafine tenei ki tala o Elia mo te fafine Salefata mo te vavega fakafoofogina ne fai ne Elia ite vaitau tena.

Ko vaitau konei o te malosai mai o te malo o Paelonia mo tena tupu takutakua ko Napukanesa, ko ia tela ne fakasaua kae ave fakapologa ne ia a te fanauga a Isalaelu mai Ielusalema ki Paelonia. Kae ko te vaitau foki tena ne malosai mai i ei a te fekau fakaola a te Atua e auale i tena pelofeta ko Elisaia.

I loto i te Galuega talai a Elisaia e uke a faigata mo fakalavelave, ona loa ko te se fakalogo o tino tonu o te Atua, kae maise ko te fakamataku mai o te fili. Kae ne fai foki a te mea taua tenei ne tupu mo tala taulia i loto i te fakamoemoega o te fano ki mua o te Galuega fakaola a Elisaia.

Ko uiga mo tulaga taua konei e tau o maua kae mautakitaki ia tatou Kelisiano e ola i te olaga tenei....Ke fakataua ne taua a tulaga o te fekau mo te Galuga a te Atua i loto i tou olaga fano ki mua.....Te Atufenua faitau i te lomiga muamua o te lama o te tausaga 2014.Takitaki o te Atufenua, te Malo, Fenua, Ekalesia mo kaiga.E mata i loto i au atiakega, i loto i au fakatokaga i te tausaga fou

tenei, e isi ne au kiloga mo ne au fakatokaga mo te manuia o kaiga; o fenua; o te atufenua mo te Ekalesia?.E mata e isi sau fakatokaga mo se avanoaga o te Atua i loto i tou kaiga, tou fenua, tou atufenua mo tau Ekalesia.....e mata ko isi nei se potu io me se fakaosoga mo te Atua ne fakaavanoa ne taua i loto i ta kaiga????

Amutia koe te Takitaki, Amutia koe te Pule, Amutia koe te Matai, Amutia koe te Tamana mo te Matua tela a tau tau pule mo tau fakatokaga ne fakavae mai te kilo alofa ki te Atua ko te mea ke isi sena avanoaga i loto i au atiakega mo te lei o te ataeao manuia o Tuvalu. Tasi tenei o mea faigata ia tatou o fakatino kae fakataunuu, tela ko te se malosia tatou o fakatoka se avanoaga mo te Atua i loto i tou olaga. Kae e maua la mai ifea te malosia o tatou o fakatoka se avanoaga o te Atua i loto i tou kaiga, tou fenua, tou Ekalesia kae maise iei ko te tou atufenu?

I te Lomiga muamua o te lama o te kuata muamua o te tausaga fou tenei, e taua ke fakatoka se avanoaga mo te Atua i loto i 'tou olaga, e fai i ei mo oso tauave e maneanea i ei a taua i loto i faigata mo fakalavelave o te olaga nei. Te fekau fakamanatu e fakamasaua mai ke fakatoka se avanoaga, palani fakalei ne taua Takitaki, Pule mo Matai o kaiga, a te faigamalaga o te tausaga fou tenei ko te mea e iloa ke i ai a te Atua i loto i ta fakamoemoega e manuia i ei a te faigamalaga.

Ko Iesu Keliso ko te fakaakoakoga sili mo tatou Kelisiano i te olaga tenei, mai luga i ana fakatokaga mo ana palani ne mafai i ei o tuu saoloto i ei a tatou mai te masei mo te mataga o te agasala, tenei ko mafai ei o maua ne tatou a te ola nei ke oko e iloa kite se gata mai. Amene!

TE MISIONA (MISSION) A TE EKT KI TE FALE-PUIPUI

Rev. Soama Tafia

A te Galuega faka-Faifeau a te Ekalesia Kelisiano Tuvalu ki te Fale Puipui se tusaga e taua tela e tauave ne te Ekalesia i tausaga taki tasi. A te galuega faka-Faifeau a te Ekalesia Kelisiano Tuvalu ki loto i te Fale Puipui e fakavae mai loto i te Tusi Tapu. I te Feagaiga Mua Isaia 61: 1, e fai penei a muna a Isaia, "A te Aliko Sili ne fakafonu ne ia au ki tena agaga. Ne filifili ne ia au, uga ei ne ia au o avatu te tala lei ki tino mativa; o fakalei a loto o tino fanoanoa; o folafola atu te fakaolataga ki pagota mo te saolototoga ki tino i loto i fale-puipui." E fakaasi mai i konei a te tulaga o te talaiga o te Tala lei e se tau ke fakatuakoigina, kae e taua ke fakaoko atu ki tino katoa kola e aofia foki i ei a pagota.

A Iesu e pela mo te molimau a Luka (Luka 4: 18), ne faitau ne ia a pati a te pelofeta ko Isaia. (kona mai luga i te Isaia 61: 1). E taua ki a Iesu ko te Tala lei ke fakaoko ki tino kola e se fakataua ne tatou i tou mafaufau. E tenei foki a te fakamoemoega o te Ekalesia Kelisiano Tuvalu, i tena galuega ki te talaiga o te Tala lei ke fakatumau ki fanau a Tuvalu konei e nofo i te vai tau tenei i loto i te fale-puipui.

A te galuega ki te fale-puipui e fai sale i vaiaso takitasi, ko te aso tolu e fai ei te asiasiga ki te fale-puipui kae ko te Aso Tapu ko te taimi e fai ei tapuakiga tela ko kau fakatasi ei a pagota. Se avanoaga e taua tenei o folafola a te muna a te Atua e pena foki te fekau o te Aso Tapu e fesoasoani ki te fakafouga o te olaga e pela foki mo te atiakega o se fakamoemoega ola i fanau pagota.

Ko te fakamoemoega ke talosia fakatasi ne tatou fanau a Tuvalu konei e nofo i loto i te fale-puipui mo te vai tau tenei. Ko fakamanuiaga ki pagota katoa e pena foki mo pulisimani tausii o latou, te Atua ke tumau o kau fakatasi ki a koutou i aso takitasi.

MO FAFINE
SULUFAIGA UOTA

Talofa koulua i te itulau masani tenei mo Fafine. Te alofa mo te agalei o te Atua ko mafai ne tatou o maua se tausaga fou i te ola mo te manuia mai i te takitakiga filemu a te Tamana alofa.

Te muna ko aumai ne au ke onono fakatasi tatou ki ei e maua mai i te losua 1:9. Ne fakatonu ne te Atua a losua ke loto malosia mo tena fakamoemoega me ko losua ka fakaoko ne ia te malaga a te fanauga Isalaelu ki te fenua o te Feagaiga. Ne fakaalaala foki ne te Atua kia losua tulaga faigata kola ka mafai a ia o oko ki ei, e pela mo te loto tukaki; te loto fakavaivai, te loto foki ki tua. Ne tulaga kola e mafai o fakalavelave i ei te malaga ke mafai o fakataunu ki te fenua ne moeakigina ne te fanauga Isalaelu, tela ne faimalaga ei latou mai loto I

MO KAUVAKA

Rev. Fuiono Piita

Aikupito. So se tulaga faka tukaki loto, ne lagona mo mafauauga kola e faka ala ne ia te se fano ki mua o te malaga a te fanauga a Isalaelu. Konei a tulaga kola e manako ki ei te Aliko ke fakaseai i te loto mo mafauauga o te takitaki kalagagina tenei ko losua. Te pogai taua e tau o fakamalosiaina ko te fakanaa fakalagolago ki te malosi mo te takitakiga a te Atua tafasili i te maluga, aua ko ia ne kalaga ne ia losua ki te Galuega. Ko ia foki e fakamalosi ne ia te loto o losua, kae ko ia foki te Takitaki sili tela ka mafai ei ne losua mo te fanauga katoa a Isalaelu o maua se loto fai ki mua ko te mea ke mafai o taunu manuia te faiga malaga.

Te fakatonuga a te Atua ne fai kia losua ke loto malosi kae ke loto talitonu. Tela la e taua ke tuku katoa tena talitonu ki te Atua me ko ia ka aumai ne ia te malosi katoatoa ki luga i a ia. Te loto talitonu tela e tau o fai ne losua, ko te tuku katoatoa tena loto mo tena talitonu ki te Atua. I nisi fakamunaga ko losua ke seai se loto mataku i a ia o tuku tena talitonu ki luga i te Atua, ke fakagata tena mafauau mo tena fakamoemoe ki tena malosi faka te tagata. Ke fakagata ona lagona i ana aofaga fai ko la e fakavae ki tena malosi faka te tagata ka mafai ei ne ia o fakataunu tena tulaga faka takitaki, kae maise ke mafai ne te fanauga a Isalaelu i tena malaga tenei o ulu atu ki loto i te fenua o te Feagaiga. Ko te fakanaa katoatoa ki te Atua ke takitaki ne ia tena tavini tenei i te fakamoemoea tela ko kalagagina a ia i ei. Me kafai e tuku katoatoa te loto mo te mafauau, ko katoatoa ei tena tulaga talitonu ki te Atua.

Mo taua fafine i te tausaga fou tenei ko sasaele a tatou i ei ke fakataua te toe kilo taua ki luga i te fakatonuga ne fai ne te Atua kia losua ke loto malosi kae ke loto talitonu. I sose saelega e fakafeagai mo tatou, e taua ke tuku katoa te tou loto mo te tou mafauau ki te Atua i tona alofa mo tena malosi. Me koi a e aumai ne ia sose malosi tela e manakogina mo tatou ke mafai ei ne tatou o fakataunu tulaga o tiute kalagagina o tatou, tulaga o sose fakamoemoea i tena takitakiga alofa. E tau o fakamaluga ne tatou me i te fakanaa ki te Atua alofa e fakatoka katoa ne ia

tulaga katoa osose saelega ke iku mo te manuia. Ke manuia koulua matua i te alofa o te Atua.

Talofa Kauvaka o Tuvalu i loto i te Atufenua e pena foki kauvaka salalau i feitu katoa o te lalolagi. E talitonu te loto me manuia katoa koutou i te alofa atafai o te Atua. Ko te muna a te Atua mo te taimi tenei e maua mai i te Evagelia a **Luka 18.18-27**, Kae ko filifili te fuaiupu e 27 mo fai te matua.

“Kae ne fai atu a Iesu, a mea kola e se mafai i tino, kae e mafai i te Atua.”

Ulu o te Lauga: E FAIGOFIE MEA KATOA I TE ALIKI.

I te olaga masani o tatou, e uke a fakalavelave mo fuifaiga o te olaga, ko la i nisi taimi ko se maua ne te tagata o fakafeagai. Kae ki te Kelisiano a fuifaiga konei ne mea e mafai o fakafaigofie manafai te olaga ko oti ne fakavae tonu ki te Aliko. Kae maise ko te fakanaa tasi ne tatou o te Atua io tou mea katoa e fai. Ka mafai ei ne tatou o fakatalitonu me i mea kola e faigata ki te tagata kae e faigofie fua ki te Atua.

Tenei foki loa te fekau taua e fakaasi mai ne te Tusi Tapu, me i te Atua o tatou se Atua e ola kae e se mate. Tena poto, tena Alofa, mo tena malosi foki e tumau ki te se gata mai. Ko tena poto, tena alofa mo tena malosi ne fakaasi mai ei a ia ki te lalolagi e auala i tena tama fagasele e tokotasi ko Iesu keliso.

Te tusi tala ko Luka e tala mai ne ia te tagata maukoloa, te la se tala e malamalama tatou i ei. A ia se tagata e lotu kae tauloto foki ki tulafono. Te vau o ia kia Iesu, e fakaasi mai i ei, me i te tagata tenei, e fia malamalama, me se a te uiga o te olaga faka-te-Agaga. E se gata i ei, a ia se tagata e maukoloa, kae lei foki tena olaga, i mea tau te olaga nei.

Ko tena uiga ka mafai o isi ne mafauauga, me kafai ko maukoloa se tino, a ia ko agasala. Ikai, e taua ke iloa ne tatou, me i te tino e agasala fua manafai ko fakamuamua, kae pologa foki tena loto ki mea o te lalolagi tenei. Kae ko fakatulaga lua foki ne ia a manakoga o te Aliko.

E fai mai te tusi tala ko Luka me ne fakatonu atu a Iesu ki te tagata maukoloa tenei. E toe tasi te mea e tau o fai ne koe.

Fakatau atu au mea katoa, kae avatu ki tino mativa, kae ka maua ne koe te koloa i te lagi. Ko vau ei koe o tautali mai i au. E lavea ne tatou i te tala, a te faigata o muna a Iesu konei ki te tagata maukoloa.

Ne oko ifo ei ki a ia a te loto fanoanoa, ona ko tena loto manumanu ki ona koloa e uke. Ne lavea ne Iesu te faitu tenei, tela ne fai atu ei a muna a Iesu i te fuaiupu e 25. Me e faigata i te kamela o ulu i loto i te pu o te nila, kae sili atu te faigata mo te maukoloa o ulu atu ki te malo o te Atua. Ko te fekau taua tela e taumafai a Iesu o fakaasi mai, me faigata i te tagata o ulu atu ki te malo o te Atua, manafai a te tagata tena e pologa tena loto ki koloa mo fiafiaga o te lalolagi tenei.

Masaua la, me ko so se mea e fakatulaga muamua ne koe i lo te Atua, ko te ifo ki tupua tena, ka ko te ifo ki tupua, ko te agasala tena i mua o te Atua. E tenei foki loa te tulaga taua ne fakamalosi ei ne Paulo tena tama faka-te-agaga ko Timoteo, Ana muna; *“Me i te manako ki tupe, ko te mafuaga tena o mea masei katoa (1 Timoteo 6. 10).”* E se masei manafai e uke a ‘tou tupe, ae ko te masei mote agasala e pokotia ei te tagata, manafai ko valea ki tupe, kae mafaufau me i mea konei i a ia totino e iloa.

Te fesili, kai a ko uke i ei a fakalavelave, mo mea e tupu ki tou olaga i aso nei? E taua ke iloa ne tatou me i te tupe ko fai nei mo atua o tino o te lalolagi kae maise ko te tou atufenua ko Tuvalu. E setioa la o seai se filemu. E setioa foki o seai se olaga tokagamalie o tino, i loto i te malo, fenua, te ekalesia, kae maise loa ko kaiga takitasi. E fakaasi mai konei, me ko oko ki te taimi ko tau i ei mo te Tuvalu o toe onono fakalei aka, ke mo a tatou e pokotia ne te masaki, tela ko te valea ki tupe, me seai se tokaga malie e maua i ei, na ko te olaga faifili mo te lotomasei. Fai mai Paulo; Me i te manako ki tupe, kote mafuaga tena o mea masei katoa.

Masaua me i te Atua, e manako ke tiakina tou loto finafinau ki mea o te olaga, kae ke se puli foki ia taua me i te Atua ko te pule katoatoa o mea konei, e fakasoa mai foki ne ia mea lei katoa, e manuia ei a olaga o ana fanau i te olaga nei.

Muna Iesu, E pena foki e iloa mo koutou, e se mafai o fai a se tino mo oku soko, seiloga ke tiaki ana mea katoa. (Luka 14.33). Ko fakamalosi mai ne Iesu, ko te

mea ke tuku io tou mafaufau, me i mea katoa kola e maua ne tatou- ko tupe, ko fale, ko manafa, mo nisi mea aka foki, ne aumai ne te Atua. Ko tena uiga a mea katoa konei e tau o fakavae ki te Atua, kae ke fakaoga foki ne ia ki te mea e loto a ia ki ei. E vikia foki ei tena igoa nei ki te se gata mai.

Masaua me e se ko te tagata maukoloa fua e tau o fakasao mai i te gali mo fakaosoosoga o te olaga nei. Tatou katoa foki e tau o faeteete io tou manakoga faka-te-foitino.

Ioane 2.15-17, Sa tuku outou loto ki te lalolagi, io me ko so se mea faka-te-lalolagi. Kafai e alofa koutou ki te lalolagi, ko tena uiga e se alofa koutou ki te Tamana tela e i loto ia koutou. Konei katoa a mea e taku ko mea faka-te-lalolagi. Ko manakoga agasala, ko mea e matea ne tino kae manako ki ei, mo mea katoa i te lalolagi nei kola e fakamatamata ki ei a tino. E seai e iloa se mea o mea konei, e mafua mai i te Tamana, e mafua mai katoa mai te lalolagi. A te lalolagi mo mea katoa i ei kola e manako ki ei a tino, e palele atu katoa, ka ko te tino tela e fai ne ia te mea e loto ki ei a te Atua, e ola ki te se gata mai.

Ea, e mata e mafai tatou o sao mai i fakaosoosoga e uke o te olaga tenei? Ao, me fai mai te matua; me i mea ko la e se mafai i te tagata, e mafai i te Atua.

Ne a nei a mea ko fai mo fakalavelave ki tou olaga tavini mo Keliso? E tonu e uke a fakalavelave mo fakaosoosoga e pokotia ei tou olaga, tela i nisi taimi, ko se mafai ne tatou o fakafesagai. E pela e iloa mo te tulaga ne oko ki ei te tagata maukoloa, kae e fakafetai me fai mai te muna ate Atua, me i mea kola e se mafai i te tagata, kae mafai i te Atua, e auala i te tou fakatuanaki.

Ko tena poto, tena alofa mo tena malosi, ne fakaasi mai ei aia kite lalolagi, e auala ia Iesu Keliso, tela ne mate i luga ite sataulo, ne tanu ki lalo ite tugamau, kae ne toe tafuke manumalo mai te mate, ko te mea ke maua ne koe mo au ate ola mo te manumalo tumau ite olaga tenei ke oko atu foki e iloa kite ola ese gata mai. Amene!



TE MALAGA ASIASI A TE KAUNISILA MO TE MISIONA I TE LALOLAGI (COUNCIL FOR WORLD MISSION)

Rev Soama Tafia

E isi se malaga asiiasi a te Kaunisila mo te Misiona i te lalolagi (CWM) tela ne fano ki Nauru i te po 18 ki te po 28 o Fepuali 2014. Te Malaga asiiasi tenei se fakatokaga a te CWM mo Ekalesia kola e kau i loto i te CWM. Te pogai o te polokalame asiiasi tenei se fakamalosiga ki Ekalesia mo Kaulotu ko te mea ke mafai o tupu ola te fakatuanaki mo te olaga fakatino i loto i Ekalesia mo Kaulotu, tela e aofia i ei te olaga tapuaki mo te olaga mafuta mo te muna a te Atua.

Te fakamoemoega foki o te Malaga asiiasi tenei ko te mea ke mafai o fetufa'aki a iloa mo atamai (experiences) o te potukau asiiasi mo tino o Ekalesia mo Kaulotu takitasi. Ne kau fakatasi atu ki te Malaga Asiiasi muamua tenei a te CWM ko sui mai te Congregational Federation mai Egilani, te sui mai te Presbyterian Church i India, te sui mai te Ekalesia i te Carribean, te sui mai te Ekalesia i Zambia, te Failautusi o te CWM mo te Pasifika, te sui o te CWM ofisa mai Singapore mo au ei Rev Soama Tafia mai te Ekalesia Kelisiano Tuvalu.

A te team tenei ne maopoopo i Brisbane Aositelia mai te po 18 ki te po 10 o Fepuali 2014 o faipati e uiga mo mea kola ka fai ne latou manafai ko oko ki Nauru o fai a te galuega. Ne loto tasi a te team tenei me i te Malaga asiiasi tenei e fakataua i ei ko te sautalaga mo tino o Ekalesia io me ko Kaulotu takitasi i Nauru, kae se se malaga o fakatonu a Ekalesia mo Kaulotu ki mea kola e tau o fai ne latou. Ne oko a te team tenei ki Nauru i te vaveao o te aso lima po 21 o Fepuali, kae ne kamata te galuega a latou i te aso ono po 22 o Fepuali 2014.

Ne toe fakasoko a te galuega a te team tenei i te aso gafua po 23 Fepuali ke oko ki te aso tolu po 26 Fepuali, kae ko te aso fa po 27 o Fepuali ne galue ei a te team o tuku fakatasi a te lipooti e uiga mo mea kola ne maua ne latou mai te asiiasiga ki kaulotu takitasi maise ko vaivaiga i te misiona a te Nauru Congregational Church. E uke a faitu fesoasoani kola ne faka'sae aka ne te team i tena lipooti kae ko te fakamoemoega ke fai mo fesoasoani ki te fakamalosiga o te misiona a te Ekalesia i Nauru.

Ne lavea ne te team a te 'kese o te fakateletelaga o te Ekalesia i Nauru mo nisi o Ekalesia i te Pasifika

maise ko Fapopotoga Ekalesia (Congregational Churches). Kae e ui i ei se avanoaga e taua mo te team a te CWM o sautala mo takitaki o te Ekalesia Nauru mo faitu fesoasoani kola e mafai o faka'aoga ne latou e atiake i ei a te galuega a te Atua i Nauru.

Ne maua foki soku taimi o takitaki a te lotu kaufakatasi a tino Tuvalu, Kilipati mo Fiti i te taeao o te aso tapu po 22 Fepuali 2014. E tokouke a tino ne kau fakatasi atu ki te lotu tenei, ko te lauga fua ne fai fakapalagi kae ko pese mo te faitauga o te Tusi Tapu ne fai e iloa ki gana a fenua konei e tolu. Ko te afiafi o te aso gafua po 23 o Fepuali ne fai ei te 'kaiga a te kau Tuvalu o tatou i Nauru ki a au maise ko tino loa o te EKT, e nofo pela ki se valu o kaiga ne kau fakatasi atu ki te 'kaiga tena kae e isi foki ne seki oko mai, tela te fakatauga me tai katoa loa te 10 o kaiga o tino Tuvalu (EKT) i Nauru. Ko te afiafi foki tena ne sautala matou ki niisi o manakoga o latou kola ne fakamolemole mai ke fakaoko mai ne au ki te ulu ofisa o te Ekalesia Kelisiano Tuvalu.

E tasi o manakoga o latou ko te mea ke mafai o maua se Faifeau mo latou. Ko te sua manakoga o latou ke maua atu ne tusi pese ma latou ke fakaaoga ne latou i olotou tapuakiga. A te tulaga o tapuakiga a fanau Tuvalu a tatou i Nauru, a latou e lotu fakatasi mo te kau Kilipati e pena foki mo Fiti, kae fakasolo i a latou a te takitakiga o tapuakiga olotou tapuakiga i Aso Tapu takitasi. Ko famanatuga a latou e fai sale ne te Faifeau ko Roger mo Stand mai te Ekalesia Nauru.

A lotu a latou e fai e iloa i te Fale tapu tela i te location. A te Fale Tapu tena ko oko ki se tulaga se 'lei aua ko te leva e iloa o te fale kae se Fale Tapu tela ne fakaaoga i taimi o te BPC mo te NPC. E isi se fakamoemoega ke tuku ifo ki lalo e pela mo muna a te Pelesitene o te Ekalesia Nauru ko Roger, kae kafai ko tuku ifo ki lalo ko latou konei ka fakaaoga ne latou te fale tapu tena i Aiwo.

Ne maua foki se taimi o te team o matamata ki nisi o koga koga o Nauru maise ko te Refugee Camp tela e tu i luga i te top side, e tokouke a fafine tagata mo tamaliki kona e nofo i fale ie kae nofo ki se fia o afe kona e nofo i camp kona e lua. Kae e tokouke foki a tino galue i ei kola e leoleo ne latou ke mo a e to ki tua mo pui o camp kona. E tasi o vaega o atiakega tenei e

lasi kii a te sene e maua ne te malo o Nauru mai Ausitalia ona la me e a ia te fakatokaga tenei. Kaati la kona nai tala mai te malaga asiiasi a te CWM ki Nauru, kae malosi katoa a fanau Tuvalu katoa kona i Nauru, kae ko moli mai olotou alofaga mo fakamanuiaga.

TE MALAGA KI JAMAICA

Rev. Fitolau Puapua

Ne taunu te Malaga ki Jamaica i te itula e 6.00 afiafi o te aso gafua tela ko te po 2 Setema 2013. Ne faka feiloai maua mo te sui mai te Ekalesia Nauru ne te tino galue mai i te United Church o te Caribbean mo te Cayman islands tela ne ave ei maua ki te Shelly Retreat Hotel kaati se fa sefulu minute mafai e tele mai i te malae vakalele. I te motou auala ki te Hotel ne lavea ne maua me i te fenua e tai pela loa mo Fiji. Te tau o te aso e velavela te afiafi. A ona auala e feoloolo kae se ko te tulaga pela mo auala o Niusila mo Ausitalia. A tino foki kola e lavea atu ne maua ne tino uli katoa seai ne palagi e lavea atu. Ko niisi pikoga o auala e isi ne tama sitoa kae mumumu i ei ko lafu tino uli.

Ne oko atu te malaga ki te Hotel kaati ko teka malie te fitu i te afiafi. I loto i te Hotel ne fakailoa mai ne tino galue me i sui katoa ki te New Face to Face ne olo ki te talaaga o te tausaga akoga a te akoga faka faifeau a te Ekalesia Kaufakatasi a te Kalipiani mo Cayman, tela e fai i loto i te akoga. I kona foki e iloa ne taunu mai te motoka ke ave maua ki te Akoga faka-faifeau. Matou ne taunu atu kae koi usu a te pese mai mua o te lauga tela ne avatu ei maua ki loto. Ne palele a te pese soko atu loa mo te lauga tela ne fakatokagina ne te pule o te Akoga tela se fafine kae ko maua tena failoga Tokita. Ne palele a te lotu soko atu e iloa mo te kaiga i te hall e tasi a te akoga. Ko oko loa i te gali o meakai kae maise ko te avanoa tela ne tuku mai kia maua ke fakamaina ne maua me ko oi a maua ka ne a foki ma galuega mo fakamoemoega i Ekalesia ne aumai ei maua. Ne maua foki te avanoaga o sausautala mo tamaliki ko la ko ulufale mai ki te akoga pela foki mo latou ko la koi akoga. Ne maua foki se avanoa o sausautala mo niisi sui ki te New Face to Face mai niisi Ekalesia. Ne foki atu katoa matou mo sui katoa ki te Hotel mai tua o te sefulu i te po.

I te fitu i te taeao ne fai ei te kaiga soko atu e iloa mo te lotu taeao i te afa o te fitu kae ne kamata te mataupu muamua i te valu. Ne iloa ne maua mo te sui mai Nauru

me ne kamata i te aso sa a te polokalame ki te lotu tala ne fai i te sefulu i te taeao kae seai ne polokalame i te aso sa tena. I te taeao tenei o te aso gafua ne kamata i ei a polokalame o te valu vaiaso o te Face to Face polokalame a te CWM.

Te polokalame tenei a te CWM e fakapitoa e iloa ki luga i Faifeau mai Ekalesia e kau i te Kaunisila mo Galuega Talai i te Lalolagi io me ko te Council for World Mission. Te fakamoemoega maluga ke ati ake a te iloa o faifeau i te faiga o te Galuega Talai, mai i te tauloto ne latou mai niisi Ekalesia a tulaga o te faiga o te Galuega. Ko te olokalame e tasi te vaiaso ka fakamasani ei a sui taki toko tasi ki te Atufenua tenei ko Jamaica, tela ka tauloto ne sui katoa a mataupu e uiga ki Jamaica i tena faiga Malo mo talafakasolo pito. Ko matau silisili faka te Kalipiani tela e aofia ei a Jamaica mo te aofia o Jamaica i mataupu e tau atu ki tatino fakatupu fakalavelave. (Crimes and violence), Mativa mo fakalavelave sokotaki mo te Globalization.). E tusa mo te tino gafulu mo te toko lua a sui ki te polokalame tenei. (Nauru, Kilipati, Samoa, Initia e tokolua, Madagascar, Taiwan, South Korea, England, Kenya mo au ei mai Tuvalu. E toko tasi te sui seki oko mai ona ko tulaga o ana Visa. Mai i te aso gafua tena ne kamata te kiloga matou ki te atufenua tenei ko Cayman islands, tela e lua sefulu minute ki te afa itula ma lele koe i te vakalele mai Jamaica international airport. A te Cayman islands se fenua loa e tasi mo Jamaica kae e kesekese la faiga malo. Koi tuai o tutokotasi a Jamaica, a laua ne nofo mai lalo o Peletania kae ne tutokotasi Jamaica kae ko te Cayman koi mai lalo te ononooga Peletania. E ui e iloa laua ko tasi faka tele e iloa la faiga malo kae i tulaga faka-te Ekalesia io me ko te lotu, a laua e tasi e iloa te la Ekalesia mo Jamaica tela ko te United Church o te Caribbean mo te Cayman islands kae ne Ekalesia katoa mai lalo o te CWM. A te Cayman islands e tolu a fenua i ei tela ko Grand Cayman, Brac Cayman mo te little Cayman. E tusa mo te 102 square kilometres te laukele o ia kae e tu ki te sauté o Cuba. Ne iloa atu foki mai te presentation e uiga mo Cayman islands me se fenua e lasi a tena maumea ona ko tualisi kola e aumai o tafao i te atu-motu ko te Caribbean. Te faigofie o vaka e

ulu mai i te Panama canal kae maise ko offshore bankings konei e lasi o teu i pangike i Cayman mai atufenua maumea kola foki e uke a tualisi mo maumea a latou ko fai mo auala e lasi ei te maumea o te fenua tenei ko te Cayman islands.. E tokouke foki a tino o te fenua tenei ko Cayman e galue faka-kauvaka i vaka tali kako mo pasese tela se alaga tupe lasi kii e maua ne latou.

Mai tafa o Cayman ne maua se avanoa o onono matou ki luga i te fenua ko Jamaika kae ne tasi loa te vaiaso ne tauloto ne matou a mea taua e uiga mo te Atufenua tenei.

Jamaica tena laumua ko Kingston. A te lasiga o tino i konei ne tino uli. A tino uli konei ne aumai mai Afelika ne tino Spain maise foki tino Egelani. Te pogai ne aumai ei a tino uli konei ko te mea ke galue i fatoaga tolo. Tokouke tino sukesuke ne fakamatala ne latou te tulaga fakalofa o tino totino o Jamaika kola ne red Initia ko la foki e maua i sa Amelika. I taimi o tino kena kola ne Spaniards ne fakagalue pologa ne latou a tino konei indigenous Jamaicans i fatoaga tolo kae i taimi ne poko ei famai lasi ne se kave ne latou ki tino konei a vailakau tela ne ala i ei o fakasolo o mate taulasiga. Ne fai eiloa pena ne tino Spain a tino indigenous konei tela ko foliki kii te aofaki o tino konei kae ko se maua foki ne latou o galue i fatoaga. I tausaga e uke ki tua ona ko foliki fuainumela o tino konei e faka pologa i fatoaga fakatasi mo te aofia o Peletania i faiga pologa penei ne kamata o aumai ne latou a tino uli mai Afelika o fakagalue i fatoaga tolo mo cotton. Ke oko mai ki aso nei toeitiiti ko tino e maua ne tatou i Jamaika ne tino uli katoa. E uke tausaga ne fakafeagai tino uli mo te olaga pologa kae maise ko te faka kesekese o tino uli ne tino kena ke oko ki te taimi ne faka-gata ei te olaga pologa i te afe iva selau tupu.

Te faiga Malo a Jamaika e pau eiloa mo tatou. E isi sena Prime Minister tela se fafine. E isi sena Kovana tela ko te sui o te Tupu fafine. Tena Malo se faiga Malo fai potukau. Ko te Jamaica National labour party mo te Democratic party of Jamaica. Te aofaki o tino i ei e mai luga mo te lua miliona kae i niisi o molimau e fai mai me ko nofo te aofaki o tino Jamaica i te fa miliona.

Te tulaga maumea o Jamaica e fakatulaga me se fenua penei mo Tuvalu tela e aofia i fenua koi atiake. A te maumea fakatau atu ki tua e aofia ei te Bauxite mineral mo faite aluminium mo te Suka. I te vaitaimi nei Jamaika e nofo i te numela tolu i te faka-tulagaaga o fenua e lasi te

nofo kaitalafu. Ko Tiapani napa tasi ko Greece napa lua mo Jamaika napa tolu. Tiapani e seai se fakalavelave me e uke ana alaga tupe mo reserves e tina ki ei ana kaitalafu kae ko Jamaika e faigata kii tulaga tenei. Te malosi te tupe Jamaika ki tupe Amelika e \$1 US ki te \$100 Jamaika. E maua ne tatou te fakalofa o te mativa o Jamaika mai i te togi mafa o meakai maise ko ika. Mai tafa i ei, e maua foki ne tatou a tino fakalofa e tokouke i lalo i sitoa mo tafatafa o auala. Kae maise ko koga tausai ei tino mativa seai ne kaiga e aofia ei tino se katoatoa mo tamaliki seai ne matua tino maua ne te Selamete. E fakaigoa te koga e tasi penei tela e fakatele ne te Lotu Katolika ko te Missionary of the poor. E isi foki se koga e tausai ei tamaliki seai ne matua mo kaiga, e fakatele ne lotu Metotisi. E pena foki o isi se koga e tausai ei a tamaliki seai ne matua e fakatele ne te lotu United Church a te Caribbean mo te Cayman e fakaigoa kia Emmanuel. Ne maua foki te avanoa o olo atu matou o onono i te koga e tausai tino matua mo tino se katoatoa (Old people's homes io me ko old citizen's homes) e fakatele foki ne te United Church. ne lavea atu ne matou te lasi o te fuainumela o tino penei ko la e pokotia mai tulaga se lei te tulaga tau tupe i loto i kaiga takitasi.

Ne kilokilo foki matou ki tulaga o tatino mo fakatupu fakalavelave kae ne lavea atu te lasi o te fakalofa o te tulaga e ola ei a tino i te fenua tenei. A Jamaika ko te napa lua i te lalolagi te lasi o te fuainumela o tino e mate i te tatino i tausaga. I molimau mai savea ne fai e tusa mo toko fa o tino e mate faeloa i aso takitasi e tagina ne niisi tino ki fana. Kae e lasi o fakalavelave penei e fakamafua mai i te fai-gang mo te mativa loa o te olaga.

Mai i te vaiaso e tasi tenei ne kilokilo matou ki tulaga taua o te olaga o tino o te Atufenua tenei, ne olo i ei matou ki fakai ko la ka galue matou i ei mo te ono vaiaso. Kafai e oti te ono vaiaso ko toe foki mai matou ki te Hotel mo te toe vaiaso o lipoti a matou ko toe foki mai ei te Malaga. Au ne tofigina ke galue i te North Eastern Region. Te koga fenua tenei o Jamaika e tu mai tua o te town kae e nofo ki te 2,000 futu te maluga mai i te tai. I te koga fenua tenei e mao matou mai tai kae e tolu a kaulotu e galue ei au. Au ne tofi ke galue mai lalo o te Faifeau ko Ranford Herwitt kaati ko lima sefulu

tupu ona tausaga. E tusa mo te selau tupu a tino i ekalesia lasi e lua ko Mannings Hill mo Oberlin Congregations. Ko te tolu o kaulotu e foliki e nofo ki te tino fa o tino lotu i ei. E tai pau eiloa a polokalame a te faifeau e fai ia latou penei mo tatou i konei. E isi ne aso fakapitoa mo asiasiga mo tino masaki tino matua ko se oko atu ki lotu. I taimi o asiasiga ne olo saale maua i ei, e lasi taimi e kake ki luga o tama mauga mo vanu kae e isi foki ne koga e sasale tatou i tama auala laupapa i luga i vaitafe. Ko te fakalavelave a kaulotu konei ne ave au ki ei e tu loa i tua o mauga.

E isi foki ne aso o te vaiaso e fai ei a suksesukega ki Tusi Tapu a te kau lotu mo te talavou. Polokalame e tai foou ki au ko te olo maua mo te faifeau mo elders o te kaulotu o fagai a tino mativa i aso sa takitasi. Se polokalame e taua kii ki te Ekalesia tenei. A tino o te kaulotu tenei e tokouke loa ne tino fai fatoaga katoa. A latou e ola loa i te togi olotou pii mo fuaga lakau. E faigata kii a te olaga kia latou. A te faiga o famanatuga mo mate e penei eiloa mo tatou kae ko te su a mea ko tai kese ei te Ekalesia tenei ko ana tapuakiga ko lasi loa te faka Pentecostal. E gali foki te kiloga mo se suiga kae ko tai malosi tela ke oko ki fakatokaga o te lauga e tai malosi te kiloga faka-Pentecostal. Ne maua foki toku avanoa o takitaki lotu kae lauga i kaulotu katoa konei e tolu. Ne fai te kaiga fakamavae a matou mo kaulotu konei e tolu i te aso Tapu kae toe foki atu au ki te Hotel i te aso gafua i te tutonu.

A te polokalame ne fakaoti eiloa i te vaiaso tenei tela ne fakatokatoka omotou lipoti i te aso gafua kae fakasolo presentations i te aso lua ki te aso lima. Ko te aso ono ne pono i ei a te polokalame kae ne kamata o toe aumai a te faigamalaga i te aso gafua. Te polokalame se avanoaga gali kii mo matou katoa ke mafai o tauloto ne matou a te faiga o te Galuega i se enivalomene tela e kese mai mo tatou. I se atufenua penei mo Jamaika ne fanau mai latou i foliga o te pologa ne iloa foki ne latou te Atua i faigata mo faka-lavelave. E ui eiloa te tulaga fakalofa penei kae ko oti ne iloa ne latou a te mealofa tonu a te Atua i a Iesu Keliso ko te Saolotoga tonu tena mo latou. Ke fakamanuia ne te Atua taumafaiga katoa e fakafeagai mo te United Church o te Caribbean mo te Cayman islands kae maise ko toku Faifeau Rev Ranford Herwitt mo tena avaga mo ana tama, toku fatama Ko Jerniffer mo Dr Paul Martin mo kaulotu katoa Mannings Hill, Oberlin mo Salisbury Congregations. Ke manuia koutou i te Alofa o te Atua.

SUKESUKEGA KI TE TUSI TAPU

Maina Talia

Tusi Faitau: Ioane 21:1-6

Text 21:6 **“Ne fai atu a Iesu ki a latou, “pei ifo te tili i te faitu ki katea o te pooti, ka maua ei ne otou ika.” Ne pei ifo te tili ka ko se mafai ne latou o ‘futi ake te tili, i te uke o ika.”**

Fakatomuaga

Talofa te kau faitau Lama! E uke kii a kiloga ki te tusi tapu, kae mo suksesukega a tatou, ka taumafai au o fakaoga se isi kilooga, tela ka kilo malosi ki luga i te fakaogaaga o pati.

I te fuliga mai te tusi tapu palagi “Cast your net on the right side of the boat” – Kae se fai mai ko te “right hand side” – Onoono foki la tatou ki te fuliga i te tusi tapu Eleni “pei te tili ki te faitu sao o te pooti.” Kafai la ko fuli faka-Tuvalu maise ei tatou ne tino e malamalama i te paopao mo te fai faiva ko vau ei tatou ki te fuliga penei “pei tau tili ki te faitu ki katea o te vaka.” E se ko tona uiga la e see te fuliga, ikai, kae ka taumafai au o fakaoga se isi kiloga ki mataupu masani tenei.

Fuaiupu e 6: Se kilooga

Mai mua malie o te tala tenei, ko te tala i a Toma— te soko tela ne manako ki fakatalitonuga, e fia lavea ne ia tulaga fao, mo te kaokao ne velo ki te tao. E fakaasi mai konei ne Ioane, me i soko o Iesu, ko ola kii ia latou te fakalotolotolu. Ia e se afaina la Toma, me taua foki tena manakoga ko te mea ke fai ne ia te galuega mo te mautinoa, kae fakalofa Petelu, te soko loa tela e taku ko te soko mataosooso, te soko fia lala-mua i mea katoa, kae maise tena tulaga fakatakiki i te mafutaga a te kau-soko, ne fakafiti fakatolu ne ia te Aliko.

E oko mai la ki te tala tenei e molimau ei te fai-Evagelia ko Ioane, a Petelu koi amo loa ne ia te amoga o te maa mo te mafatia ona me ne fakafiti ne ia te Aliko. Te toe fakaasi mai la tenei o Iesu i te fakatolu kia latou, ko te fakaasi alofa o toe fakatonu kia latou te koga sao e tau o pei ki ei a te tili o te fakatuanaki. Toe fakaasiga e fakamalosi ei te ola talitonu o te kau-soko, me i a ia ko te Mesia, ko te

fakaola ko toe tuu mai te mate.

I te tala tenei, e lavea ne tatou me ko Petelu ne fakaoso ne ia te faiva, “au ka fano o faika, kae tali mai isi soko, tatou e olo.” Manatu Petelu ki tona iloa masani, taofi mau ki muna o te tuloto-namo, maise ko ana tooga masani~kae fai mai te molimau a loane, ne fano te po, e ausage mo se mea. Tuku fakafeagai te iloa o Petelu mo te mea ko tupu. Te fakaasiga o te tautai e sona lafo fua te upega, se tautai e mafa i muna o te mulivaka kae mativa i fakatinoga.

“Muna Iesu kia latou.... “pei ifo te tili ki te faitu sao o te pooti, ka maua ei ne otou ika.” Pei te tili ki te faitu sao o te ola fakalogo mo te ola matakua ki te Atua, pei te tili ki te faitu sao o te ola fakatuanaki—me ‘ka maua ne koutou a ika e uke o fakamanuiaga. E se ko te faitu fakaatamai o te pooti io me ko te faitu ki katea e manako au o toso ki ei te sukesukega a tatou. Kae ko te faitu SAO o te pooti ~ e pau fua la, me lafo ki mua me ko tua io me ko autafa foki, te mea taua ke SAO te koga e pei ne koe kiei te tili. E ui ei te fakafiti ne Petelu te Aliko, e ui ei te tali me latou te alofa o te Aliko, kae manako Iesu o toe fakaasi tasi kia Petelu, me ko ia ko te koga SAO tela ne fakafiti ne ia. Iesu ko te koga sao.

Muna Fakaoti

I te olaga tenei, uke taimi e agi ei a kaumatagi o te olaga, kona tonu loa a taimi e mafai ei ne tatou o lafo valevale a tou tili, ka lapa a uila i loto i kaiga, ko akoakoga, fakapotopotoga, faiga-malo maise tena ekalesia, e taua ko te mea ke mafai ne tatou o pei tou tili ki te koga sao, te koga tela e tokaaga malie ei ta ola ko IESU. Iesu ko te faitu sao, tela e tau faeloa o pei kiei ta tili, i taimi o galu fati mo galu fakafua kae se fati. Te fakamoemoega ke pei ta tili ki te koga SAO – ko Iesu! Ke manuia tatou i tona alofa!

FAKAFEAGAI MO NIISI

TALITONUGA

Rev. Fitolau Puapua

E toe faka talofa atu ki te Malu o taugasoa faitau lama i te lomiga tenei o te lama. Ko toe fakasoko atu te itulau masani a tatou tenei ko te ‘*Fakafesagai mo niisi talitonuga.*’ Ko oti ne onoono tatou ki pati io me ko muna kola e fakaoga ne te talitonuga tenei ko te Mamona kola

e tai kese mo te fakaogaaga i te Talitonuga a tatou. Muna konei e aofia ei ko te muna Te ‘Atua’, ‘Tolu Tasi Tapu’, Te lagi, mo niisi muna aka kola e mafai o fakasegina tatou i tou manatu me e pau fua talitonuga a tatou mo te lotu tenei, kae kafai e ata kilokilo tatou ki fakaogaaga o pati kona e lasi kii te kese o tatou kae maise ke nofo fale ia tatou me i te lotu tenei eke se mo tatou io me e se se lotu Kelisiano.

E toe fakamasaua faatu ne au me i te fakatokaga o te itulau tenei a tatou e se mo te fakamoemoega ke fakamasei ei se lotu io se talitonuga Ikai, kae se fakatokaga mo fesoasoani ke nofo maina tatou ko la ko tino o tou lotu, i tulaga o lotu i tou tafa kae maise ko latou ko la e oloolo ki fale o talai olotou akoakoga.

I te itulau a tatou mo te lama tenei ka onoono tatou ki niisi valoaga a te tagata tenei ko Iosefa Simati tela ne fakatu ne ia te lotu tenei kae tela foki ne fai me i a ia se pelofeta a te Atua ola. I loto i te talitonuga Kelisiano a te pelofeta se tulaga taua kii ona me se avefekau a te atua. E pela mo Mose, Isaia, Esekielu mo niisi pelofeta aka i Tusi Tapu. Kae e mailoga a tino penei me a latou ne kalagagina ne te Atua mo te folafolaga o tena muna.

E lua a auala e mafai o matemate ne tatou me e tonu a te tagata tenei se pelofeta io me ikai. Muamua ko te sukesuke ne tatou me e tonu e iloa a pelofetaga me ko valoaga a te tino tenei ne fakataunu io me ikai. (Teutelenome 18: 20-22) . Ko te lua o auala, e tau o sukesuke tatou ki ana akoakoga me pau mo te akoakoga a te Tusi Tapu, me ikai. Kafai ana valoaga ne valoaga e se fakataunu mo ana akoakoga e se mai i te Tusi Tapu a te tino tena e se ko ia se pelofeta mai i te Atua. Ko tena uiga ana akoakoga ne mea loa ne faite mai i tena mafaufau e pena foki ana valoaga. Ke onoono tatou ki niisi valoaga se tonu a te tagata tenei ko Iosefa Simati.

1. Tena valoaga e uiga mo te toe foki mai o Iesu ka foki mai i loto i te lima sefulu ono tausaga. I muna a Iosefa Simati me “*i te fono ko oti ne fakatonu ke fai ona ko te*

Atua e iloa ne fakatonu ne ia kae ko oti ne fakailoa atu ki a ia i te fakaasiga mo te agaga tapu. Ne fakaasi foki ki a ia niisi fakalavelave ka fakafeagai mo tatou kae koi malaga tatou ki Siona. Ko tou tofotofoga mo puapuaga, ne fai mai a te Atua me e se fai fua mea konei ki te seai kae ka manatugina. Ko te loto o te Atua mo latou ko la e olo ki Siona mo te fia ofo atu olotou ola manafai e manakogina, e tau o faugina mo te Galuega kae ka olo atu latou ki te aso o te toe velevelega o te **togavine mo te toe vau o Iesu tela ka vau a ia i loto i te 56 tausaga.** (Tala fakasolopito o te Lotu Vol. 2, p. 189

A te tausaga o te valoaga tenei a Iosefa Simeti ko te 1835. Tela ne tau o fakataunugina te vau tenei o Iesu i te 1891 io me koi tuai te tausaga e 1891 kae ne oko atu ki te tausaga 1891 e pelo fua tena valoaga me seai se Iesu ne vau mai te lagi.

2.

Ne valo foki ne Iosefa Simati te faitega o te Malumalu o te Atua i te lelusalema fou, te la ko te Sitete o Misori i vaitaimi o ia. (State of Missouri) “Ao te muna a te Atua e uiga mo tena Ekalesia tela ka fakatu i toe aso mo te fakafokiga o ona tino e pela mo ana muna ko la ne valo mai i gutu o ana pelofeta. “ Kae mo te maopoopoga o te kau tapu ko la ka tu i luga i te mauga o Siona tela kafai mo te fakai o lelusalema fou . Tela te fakai ka faitegina e kamata mai i te Malumalu tela ko oti ne fakasinogina ne te maikao o te Atua ki te faitu ki te togala o tuakoi o te sitete o Misori. (Doctrines and Covenants 84: 2-5 31)

A te valoaga foki tenei a Iosefa Simati ne seki taunu kae a ia mo tino tautali ki ana akoakoga (Tino o te lotu mamona) ne atuli keatea mai Jackson county i te 1833 kae ne seki fakapotopoto foki latou i kona. (E pela mo ana muna me ko latou te kau tapu ka maopopo i kona kae ko latou ne afuli keatea mai kona) Ke oko foki ki te faite o te Malumalu i vaitaimi o ia e seki taunu foki. Tena uiga te valoaga tenei a Iosefa Simati se valoaga se tonu foki.

3. Ne valo foki ne Iosefa Simati me i malo katoa o te lalolagi ka aumai o aofia i loto i te taua a tino

Amelika totino loa ia latou.(American civil war). Ana muna “Au e fai atu muna te Alike e uiga mo taua konei ka oti atu. E kamata a taua konei mai i te teke atu o te sitete o Caroline i te sauté tela ka aofia i ei i te mate o tino tokouke. Ka oko mai taimi e ligi mai a taua ki malo katoa.(Sitete ki sauté ka mavae mo sitete ki matu ka ko sitete ki sauté ka kalaga ki Peletania mo se fesoasoani kae ko Peletania ka kalaga ki malo katoa kae ko malo katoa ka aumai o taua i te taua tenei a sitete o Amelika.) E fakafanoanoa me tenei su a valoaga se tonu a Iosefa Simati me e seai lele e iloa se malo io me ne malo o te lalolagi ne aumai o kau i loto i te taua tenei.

4. Ne valo foki ne Iosefa Simati me i te lalolagi ka galulu kae ka seai se la i te aso tena io me ka galo mo ne nai aso. Ana muna mo nai aso te lalolagi ka galulu kae ka teka ki mua ki tua pela me se tino vale. A te la ka funa ona mata kae ita ma sulu mai se mainaga. Te masina ka koukou ki toto mo fetu ka kaitaua kae to ifo ki lalo e pela mo fuaga o te mati mafai e to ifo mai te lakau ko te mati.(Doctrines and Covenants 88: 87)

Te valoaga tenei a Iosefa Simati ne fai i te po 27 Tesema 1832. Kafai e lau ne tatou ki te po muamua Ianuali tausaga 2000 ko tusa mo te 61,000 aso io me 167 tausaga mo te lima aso, kae e seki ai e iloa se taimi ke galo te la mo niisi mea aka foki ne valo ne Iosefa Simati ke taunu. E pena foki mo ana muna me i nai aso fua mai mua nei. Ko tusa nei mo te 61,000 aso io me 167 tausaga mo aso e lima i te tauasaga e 2000 e seke mao mo tena muna me ne nai aso mai imua nei.(te tausaga e 1832 i te po 27 Tesema.) See valoaga foki e se tonu.

5. Ne valo foki ne Iosefa Simati me ka fakataunu mai mua nei te valoaga a Isaia 11 ka fakataunu. E pena foki te fakaasiga i te Galuega 3:22-23

Isaia 11: 6-9 “ A luko mo mamoe ka nofo tasi it e filemu. A lepoti ka takatokato fakatasi mo tama kouti. A tama pulumakau

mo tama Leona ka kai fakatasi. A tama a pulumakau mo tama a Leona ka kai fakatasi. A pulumakau mo pea ka kai fakatasi. Ke oko foki eilola ki se pepe ka se fakamaeaina ma tafao i tafa o te gata poisini. (The Pearl of great price, Joseph Smith, History verse 40)

Iosefa ne manatu me ka tupu kae seai eilola se mea penei ke taunu i te lalolagi. E kese mao te fekau te la i te fakamoemoega o Isaia mo te manatu o Iosefa me se mea loa ka tupu i te kiloga o mata. Tela la se valoaga foki se tonu.

Mo taua taugasoa faitau lama konei niisi tulaga e uiga mo te tagata tenei ko Iosefa Simati ke nofo maina tatou me e se se pelofeta tonu mai i te Atua. Te fakamoemoega ke mafai ne taua o fakafesagai atu ki te te talitonuga tenei. Mo te su a lomiga o te lama ka sausautala tatou ki te lotu eilola tenei ko te Mamona mo te mataupu a tatou e penei. “ Ko mea kola e se masani o fakailoa mai ne latou manafai e aumai o talai mai te olotou lotu

TALA MO TAMALIKI

Iakina Mautinoa

Talofa koulua tamaliki, e muamua faeloa o siki te fakafetai ki te Atua me ko mafai o maua ne tatou se avanoaga gali penei, e talitonu a te lotu me maua koulua ne te foitino malosi i te vaitaua tenei kae e ui ei e ‘tau foki loa koulua o ata faeteete ona ko tulaga o masaki konei e pokopokotia i luga i te ‘tou atufenua i te vaitau nei. Tela la, mo a koulua e olo saale o ta’fao i lalo o te La io me fakasiusiu i te vaiua ia koulua mana ma’saki ei.

la, kae tenei te tala mo tatou – I se fa’kai e tasi i te fenua ko Amelika ne ola i ei se tau-matua kelisiano, a te igoa o te matua ko Luisa kae ko te igoa o tena tamaliki tagata ko Saulo. A te tau-matua konei ne ola i se olaga fakaalofa kii loa, a la tupe maua saale i alofaaga mai tino e ‘teu faka’lei loa ne Luisa mo fakaakoga ki ei tena tama tokotasi kae fakapelepele ko Saulo, mo te fakamoemoega o Luisa ke iku manuia akoakoga a tena tama ke mafai o maua ne laua se olaga ‘lei manafai ko galue. Tamaliki, a Saulo ne iku manuia tena akoga i te secondary school (*pela mo Motufoua mo Fetuvalu*) maua foki loa i ei mo tena avanoaga mai te malo o fano o akoga i te lunivesete (University) e nofo ki se 2 maila te ‘mao mo te lotou fa’kai.

Ko oko ki te taimi ko fakamavae ei a Saulo mo tena matua me ka fano ki te akoga. A Luisa ne tagi kii eilola, me ko fatoā mavae loa laua mo tena tama. Ne tagi te matua kae ‘sai ki tena tama mo ana pati e fai ki tena tama penei, “*Saulo, ko oko loa i te faigata i a au o tuku koe ke fano, ia koe se tamaliki ne tausi ne au kae fakapelepele, kae ui i ei vau o fano, taumafai malosi ki te akoga, ‘talo faeloa ki te Atua i so se taimi ka maua ei ne koe a te malosi, kae, vau saale i weekend ke fetau taua.*” Ne pena loa o fai ne Saulo a te fakatonuuga a tena matua, i weekend katoa, e vau saale loa o āsi tena matua. Tamaliki, ko fano nei ki te 7 masina o Saulo i te akoga ko uke ona taugasoa tagata mo taugasoa fa’fine, ko kamata foki Saulo o fano saale ki fale tuisi, ko inu kae ‘pusi, mai te taimi tena seki toe fano loa a Saulo o āsi a tena matua.

I te aso e tasi ne fano ei a te malaga asiasi (*field trip*) a te vasega a Saulo ki fa’kai pili ki te akoga tela, e aofia ei te lotou fa’kai. Ne olo latou i luga i te pasi (*bus*) ko tamaliki fafine loa e tokolua e sagasaga pili kia Saulo ne fai aka la muna penei, “*E Saulo tenei te otou fa’kai? tapa! te gali, oi fakaalofa la te loomatua tela e sagasaga i tafa o te mataloa o tena fale, se pono aka la te mataloa o tena fale me ko moko te aso*” Ne kilo atu Saulo kilo loa ki tena matua, ne oko ifo ki a Saulo a te alofa mo te salamo, tela ne fakatu ne Saulo te pasi kae tu o fano ki tena matua. Ana muna ki tena matua “*E mummy, kai a e se pono te mataloa o te fale me ko to moko te aso*” ne tali mai te matua “*Kooi nei, Saulo, Saulo ko koe ko taku Saulo? A te mataloa tena ko te matalaaga loa i tau fanooga e ‘tali foki loa ki tou toe foki mai.*”ne tagi Saulo kae fai atu “*E mummy fakamolemole fakamagalo mai au, au ko sē*”

Tamaliki e tena te tala mo tatou, te akoakoga, ko oti ne matea ne tatou i te alofa o te matua. E ui ei i te leva o te taimi ne galo ei Saulo, ne seki nofo te matua mo te kaitaua kae ne faitali eilola ki te foki mai o tena tama. E tenei te ata manino o te nofo fakatalitali mai o te Atua ki a tatou kola ko pule fakasauagina ne te masei o te agasala, ko te mea ke toe ‘foki atu tatou ki a ia, kae ka maua ne tatou a te ola ki te se gata mai.